



Senin, 25 Juli 2022

Ogen: Masmur 112:1-3



"Bayak Namura"



Bayak namura e perayaken enterm jelma, teridah arah ketutusenna erdahin, mejingkat, erbintuas suari ras berngi. I bas piga-piga tahun si enggo lepas lit kalak si nawarken investasi bodong (penggandaan uang), alu namaken duitta man bana bungana erlipat dua kali lipat. Lit nge piga-piga temannta namaken senna ku je, janah idaramina ka pe temanna gelah jadi anggotana. Kai akapndu perayakenna? Gelah bayak namura. Lit ka deba ka pe irit, lit kesanna pelit, dekahen muit-uit, kerina siidadapna min jadi duit. Adi sungkun kita, malem nge ate kalak si bage?

Bayak namura si iukuri manusia la bali ras bayak namura si isikapken Dibata. I bas manusia, bayak namura ningen e berkelimpaham harta, lanai terbeligai ban lalana, seh pitu keturunen pe makeken ertana e langa keru. Tapi bayak namura si isikapken Dibata e me kemalemen ate, si e la bekasta emperjuangkensa. E pemere alu cuma-cuma. Bentuk kemalemen ate bagi si isuratken pemasmur e me : 1. Anakna erkuasa i negeri. Si enda banci jadi erkiteken anak-anak e nggeluh i bas kepentaren Dibata. Tupung ia jadi pemimpin, ikelengina rakyatna, iperdiatekenna keperlun anggotana, bujur i bas ndalanken aturen, ertanggungjawab ras lit keterbukan. Erkiteken si e, enterem kalak si tek man bana. Enggo pasti orangtuana pe bangga ras ermalem ate natap anak-anakna si bage. Em ikataken bayak namura. 2. Kesusurena ipasu-pasu Tuhan. Orang tua si erkemalangen man Tuhan labo yerjeng anakna ngenca ipasu-pasu tapi seh ku kesusuren/ kempu-kempu. Ipasu-pasu e ertina ngaloken kejuah-juahen, ras keselamatan 3. Kebujurena lit rasa lalap. I bas kepatuhen ndalanken undang-undang Tuhan mahan bana kebujuren e pe enggo jadi orat nggeluh. Kebayaken anak-anak Dibata e me nggeluh i bas kejuah-juahen i doni enda ras keselamatan pe jadi sikerajanggenna.

Sangap kalak si bayak i bas Tuhan